

SIARAN MEDIA KEMENTERIAN KEWANGAN MALAYSIA

FDI Yang Diluluskan Dalam Suku Pertama 2019 Naik 73.4% Berbanding Tahun Lalu, Manakala Pengeluaran Perindustrian Bagi April 2019 Telah Meningkatkan 4.0%, Iaitu Kadar Yang Tertinggi Dalam Tempoh 6 Bulan, Mengatasi Konsensus Pasaran 2.5% Semasa Kadar Inflasi Kekal Rendah Pada 0.2%

Dengan adanya sebuah kerajaan yang berwibawa sebagai pentadbir, Malaysia berjaya memanfaatkan kedudukan dan daya saingnya dalam rantai bekalan global untuk menjadi sebuah lokasi tempat perlindungan yang terkemuka di rantau ini. Malaysia sedang menerima manfaat besar daripada pemindahan perniagaan, serta lencongan perdagangan dan pelaburan, yang timbul daripada perang dagang antara Amerika Syarikat dan China. Ini dapat dilihat apabila pelaburan langsung asing atau *foreign direct investment* (FDI) yang diluluskan telah naik dengan mendadak dalam suku pertama tahun 2019. Tambahan lagi, pertumbuhan pengeluaran perindustrian bagi bulan April 2019 telah meningkat ke kadar yang tertinggi dalam tempoh 6 bulan semasa kadar inflasi kekal rendah dan stabil.

Perkembangan positif ini memberikan petunjuk bahawa keluaran dalam negara kasar (KDNK) bagi suku kedua tahun 2019 akan tumbuh dengan sihat.

Peningkatan FDI secara berterusan

Dalam suku pertama tahun 2019, FDI yang diluluskan untuk semua sektor telah melonjak 73.4% kepada RM29.3 bilion berbanding RM16.9 bilion setahun lepas. Peningkatan ini antara lain menunjukkan bahawa Malaysia sedang menikmati manfaat yang berterusan daripada lencongan perdagangan dan pelaburan, terutama sekali apabila FDI yang diluluskan untuk seluruh tahun 2018 telah meningkat 48% kepada RM80.5 bilion daripada RM54.5 bilion pada tahun 2017.

Kenaikan 73.4% bagi suku pertama tahun 2019 ini disumbangkan oleh peningkatan pelaburan yang ketara sebanyak 127% ke dalam sektor pembuatan kepada RM20.2 bilion daripada RM8.9 bilion pada tahun lepas. Daripada RM20.2 bilion FDI yang diluluskan tersebut, RM11.5 bilion adalah berasal dari Amerika Syarikat, RM4.4 bilion dari China dan RM2.2 bilion dari Singapura (Jadual 1).

Jadual 1: Sumber FDI yang diluluskan bagi sektor pembuatan untuk suku pertama 2019 berdasarkan kepada negara asal

Negara sumber	FDI pembuatan yang diluluskan (RM bilion)
Amerika Syarikat	11.5
China	4.4
Singapura	2.2
Jepun	0.6
Lain-lain	1.5
Jumlah	20.2

Antara contoh FDI berkualiti tinggi adalah pelaburan dalam sektor elektrik dan elektronik (E&E) yang akan dibuat oleh Micron Technology dan Jabil Circuit untuk memperkembangkan operasi masing-masing di Pulau Pinang.

FDI yang diluluskan untuk semua sektor bernilai RM29.3 bilion bagi suku pertama 2019 ini dijangka akan mewujudkan lebih daripada 41,200 peluang pekerjaan baharu, di mana 22,970 pekerjaan tergolong dalam sektor pembuatan dan 18,000 dalam sektor perkhidmatan.

Kadar pertumbuhan pengeluaran perindustrian bagi bulan April 2019 adalah yang tertinggi dalam tempoh 6 bulan, mengatasi unjuran pasaran

Bagi pengeluaran perindustrian untuk bulan April 2019 pula, indeks pengeluaran perindustrian telah tumbuh dengan lebih pantas kepada 4.0% tahun-ke-tahun (y-o-y) berbanding 3.1% dalam bulan Mac. Pertumbuhan ini disokong oleh peningkatan sektor pembuatan dan juga pemulihan output dalam sektor perlombongan.

Kadar pertumbuhan pengeluaran perindustrian 4.0% dalam bulan April 2019 tersebut adalah yang tertinggi dalam tempoh 6 bulan, dan ia sekali lagi mengatasi konsensus pasaran pada 2.5% seperti yang dikumpul oleh Bloomberg. Untuk pengetahuan umum, pengeluaran perindustrian bagi bulan Mac telah tumbuh 3.1%, iaitu lebih tinggi daripada kadar 2.3% yang dijangka oleh pasaran berdasarkan kepada survei yang dijalankan oleh Bloomberg (Jadual 2).

Kadar inflasi kekal rendah

Perkembangan pengeluaran perindustrian bagi bulan April 2019 ini berlaku semasa kadar inflasi kekal rendah dan stabil pada 0.2%. Harga barangan asas pengguna telah berjaya direndahkan dan ini disebabkan oleh beberapa faktor. Antara faktor-faktor tersebut adalah perubahan sistem cukai daripada cukai barang dan perkhidmatan (GST) kepada cukai jualan dan perkhidmatan (SST), serta pengenaan harga siling ke atas harga runcit RON95 dan diesel. Dalam Februari 2019, harga siling bagi RON95 telah diturunkan daripada RM2.20/liter kepada RM2.08/liter.

Jadual 2: Pertumbuhan pengeluaran perindustrian dan konsensus pasaran

Bulan	Pertumbuhan (y-o-y)	Konsensus pasaran (y-o-y)
Mac 2019	3.1%	2.3%
April 2019	4.0%	2.5%

Sebagai contoh, harta purata bendi dalam bulan April 2019 adalah RM7.30/kg, iaitu 25 sen lebih rendah berbanding tahun lalu pada harga RM7.55/kg. Harga purata daging lembu pula adalah RM31.89/kg bagi bulan April, iaitu 133 sen lebih murah berbanding tahun lalu (Jadual 3).

Jadual 3: Harga purata bagi barangan asas pengguna yang terpilih

Barangan asas pengguna terpilih	April 2019 (RM/kg)	April 2018 (RM/kg)	Perubahan
Santan	10.21	10.50	-2.8% (-29 sen)
Bendi	7.30	7.55	-3.3% (-25 sen)
Terung	6.41	6.51	-1.5% (-10 sen)
Ayam	7.81	8.23	-5.1% (-42 sen)
Telur (10 biji, gred A)	4.07	3.45	+18.0% (+62 sen)
Daging lembu	31.89	33.22	-4.0% (-133 sen)
Syampu (botol 320 ml)	11.49	11.30	+1.7% (+19 sen)
Lampin bayi (saiz medium)	34.44	35.09	-1.9% (-65 sen)

Senarai yang lebih menyeluruh boleh didapati secara percuma di laman sesawang Jabatan Perangkaan Malaysia (<https://www.dosm.gov.my> (<https://www.dosm.gov.my>)).

Kementerian Perdagangan Dalam Negeri dan Hal Ehwal Pengguna (KPDNHEP) di bawah pimpinan Datuk Seri Saifuddin Nasution Ismail telah menjalankan tugasnya mengawal kenaikan harga barangan dengan baik sepanjang tempoh perayaan Hari Raya Aidilfitri. Kementerian tersebut akan terus berusaha dengan lebih keras bagi memastikan harga barangan sentiasa berada pada paras yang berpatutan.

Sayangi Malaysiaku!

Lim Guan Eng

Menteri Kewangan

Kementerian Kewangan Malaysia

Putrajaya

13 Jun 2019

[Tweet](#)

[Like](#)

Be the first of your friends to like this.